

მატჩის ექო

თბილისის “დინამოს” ფეხბურთელებმა როგორც ცნობილია, წარმატებით დაიწყეს ევროპის ქვეყნების თასების მფლობელთა თასის 1981–82 წლების გათამაშების მეოთხედფინალური ეტაპი და პირველი მატჩი ვარშავის “ლეგიას” მის სტადიონზე მოუგეს ანგარიშით 1:0.

გამარჯვება და ისიც მეტოქის მინდორზე, რა თქმა უნდა, დიდად საყურადღებო ამბავია და ნათლად მეტყველებს, რომ დინამოელებს ახლაც სერიოზული პრეტენზიები აქვთ ამ დიდად საპასუხისმგებლო ავტორიტეტულ შეჯიბრებაში.

უცხოეთის პრესა, სპეციალისტები, მიმომხილველები ხაზს უსვამენ თბილისელთა კარგ მზადყოფნას წლევედელი სეზონისთვის, აღნიშნავენ, რომ “ლეგიასთან” მოპოვებული გამარჯვება დამსახურებული და ღირსეული იყო. საბჭოთა პრესამაც შესაბამისად აღნიშნა თბილისის “დინამოს” ფეხბურთელთა წარმატება.

“პრავდა”: “...ამრიგად, თბილისის “დინამომ”, რომელიც ახლა ფლობს თასების თასს, კარგი შესაძლებლობა შექმნა დაძლიოს მიმდინარე ევროპული ტურნირის მეოთხედფინალი და გავიდეს ნახევარფინალში”.

“იზვესტია”: “თბილისის “დინამომ” ვარშავის “ლეგიასთან” ითამაშა ტალახიან, მძიმე მინდორზე. თბილისელებმა (თ. სულაქველიძე) პირველ ტაიმში გაიტანეს ბურთი მეტოქის კარში და შემდეგ, თავდაუზოგავად იბრძოლეს წარმატების შესანარჩუნებლად. მათ შემდეგ მასპინძელთა ზოგჯერ უსისტემო, მაგრამ მედგარი იერიშების მოგერიება. დამაჯერებლად, საიმედოდ ითამაშა მეკარე ო. გაბელიამ, თბილისელებმა კვლავ დაამტკიცეს თავიანთი მაღალი საერთაშორისო ავტორიტეტი და სოლიდური განაცხადი გააკეთეს ნახევარფინალში გასასვლელად”.

“კომსომოლსკაია პრავდა”: “თბილისის დინამოელთა შეხვედრამ ვარშავის “ლეგიასთან” დიდი ინტერესი გამოიწვია. მიუხედავად იმისა, რომ ტელევიზია აწარმოებდა თამაშის ტრანსლაციას, სტადიონის ტრიბუნები მაინც მთლიანად სავსე იყო მაყურებლებით”.

გაზეთმა **“ჟიჩე ვარშავიმ”** მოიყვანა თბილისელთა მწვრთნელის ნოდარ ახალკაცის მიერ თამაშის დამთავრების შემდეგ წარმოთქმული სიტყვები: “ფეხბურთი ბალეტი არაა, მაგრამ ამ დღეს თვით ფეხბურთელებსაც კი უჭირდათ მოძრაობა ღრმა ტალახში”.

გაზეთმა აღნიშნა, რომ პირველი ტაიმის განმავლობაში ქართველმა ფეხბურთელებმა ის სიმსუბუქე და მოქნილობა გამოამჟღავნეს, რაც ჩვეულებრივ მოცეკვავეებს ახასიათებთ ხოლმე.

პოლონური **“შტანდარ მლოდიხი”** აღნიშნავდა, რომ ვარშაველთა მწვრთნელი კ. გურსკი დიდად დაფიქრებული გამოცხადდა პრესკონფერენციაზე, იგი შემფოთებული იყო იმით, რომ თბილისელებმა ასეთი წარმატებით ითამაშეს სტუმრად.

იგივე **“შტანდარ მლოდიხმა”** მოიყვანა თბილისის “დინამოს” უფროსი მწვრთნელის ნ. ახალკაცის სიტყვები: “ლეგია” ძალზე კარგი გუნდია, მინდა მაღლობა ვუთხრა ვარშაველებს სანაქებო მასპინძლობისთვის”.

“სოვეტსკი სპორტი”: “...თბილისელები ყოჩაღად გამოიყურებოდნენ რთულ ვითარებაში, მათ შეინარჩუნეს ანგარიში თავიანთ სასარგებლოდ, ახლა ჩვენს გუნდს კარგი შანსები აქვს გავიდეს თასების მფლობელთა თასის ნახევარფინალში”.

საკდესის მიმომხილველმა, ყოველკვირეულ დამატება **“ფუტბოლ-ხოკეის”** რედაქტორმა ლ. ფილატოვმა აღნიშნა: “ჩვენ ყველანი სიმპათიით ვადევნებდით თვალს თუ როგორ დავაჟაკცდა, განმტკიცდა და საგრძნობლად იცვალა სახე უკეთესობისკენ თბილისის “დინამომ” ამ ბოლო 4 წელიწადში, როგორ გადალახა გუნდმა მისთვის ჩვეული ფსიქოლოგიური სისუსტეები. ახლა დინამოელთა დამახასიათებელი თვისებებია დამაჯერებლობა და მზადყოფნა ნებისმიერ მეტოქესთან ბრძოლის დროს, წინათ კი მათ ჰყავდათ ხოლმე ე.წ. “უხერხული” მეტოქეები. თბილისელებს ახლა შეუძლიათ განავითარონ მათთვის დამახასიათებელი შემტევი თამაში და ნებისმიერი ამოცანა შეასრულონ ცვალებადი სიტუაციებით მიმდინარე შეხვედრებში. ამის ნათელი დადასტურება იყო ძნელი მატჩი ვარშავის “ლეგიასთან”.

“ლელო”, 11 მარტი, 1982 წ.